



## **ACORDO DO CONSELLO DA COMUNIDADE DE TRABALLO GALICIA – NORTE DE PORTUGAL PARA A MELLORA DO FUNCIONAMENTO**

**31 de xaneiro de 2011**

O tempo transcorrido desde a sinatura do Acordo constitutivo da Comunidade de Traballo Galicia – Norte de Portugal fai necesario axeitar a estrutura da Comunidade de Traballo ás circunstancias actuais, sen que isto supoña a modificación do seu contido esencial.

Así, o documento asinado en Porto o 7 de xullo de 2009 entre o Presidente da Xunta de Galicia e o da Comisión de Coordinación e Desenvolvemento Rexional do Norte de Portugal (CCDR-N), abriu a porta para o relanzamento da Comunidade de Traballo, para que asuma de novo un papel vertebrador das relacións, coordinando as actuacións, intervindo en novos ámbitos e liderando aos distintos actores.

O Programa Operativo de Cooperación Transfronteiriza España – Portugal actualmente en vigor para o período 2007-2013, establece como eixos prioritarios fundamentais o fomento da competitividade e a promoción do emprego; o medio ambiente, o patrimonio e o contorno natural; e a accesibilidade e ordenación territorial; e a cooperación e integración económica e social.



A Estratexia para un crecemento intelixente, sustentable e innovador da Unión Europea, coñecida como a “Estratexia 2020” sinala como prioridades:

- Un crecemento intelixente, mediante o desenvolvemento dunha economía baseada no coñecemento e na innovación
- Un crecemento sustentable, pola vía da promoción dunha economía que empregue mais eficazmente os recursos, que sexa mais verde e competitiva
- Un crecemento integrador, mediante o fomento dunha economía cun alto nivel de emprego que redunde na cohesión económica, social e territorial.

A Xunta de Galicia e a Comisión de Coordinación e Desenvolvemento Rexional do Norte de Portugal veñen de poñer en marcha a “Agrupación Europea de Cooperación Territorial Galicia – Norte de Portugal (GNP,AECT)”, que ten entre as súas funcións a de poder servir como órgano operativo dos acordos e políticas que deseñe a da Comunidade de Traballo. En consecuencia, é conveniente que GNP,AECT coñeza desde o seu inicio as políticas que logo vai ter que desenvolver.

A Comunidade de Traballo está chamada a desempeñar un rol de liderato e coordinación das distintas iniciativas que poidan xurdir no eido da cooperación transfronteiriza. Porén, é necesario achegar a Comunidade de Traballo a aqueles actores que na actualidade están mais alonxados da cooperación transfronteiriza e integralos nas súas estruturas.



Así mesmo, é interesante aproveitar a experiencia acumulada por aqueles que, ao longo destes vinte anos de andaina, teñen contribuído a fomentar a integración entre Galicia e o Norte de Portugal.

A Disposición adicional segunda, en consonancia co artigo 9.1.c) do Acordo constitutivo da Comunidade de Traballo Galicia – Norte de Portugal outorga ao Consello a facultade de desenvolver o Convenio de cooperación transfronteiriza entre a Comisión de Coordinación e Desenvolvemento Rexional do Norte de Portugal (CCDR-N) e a Xunta de Galicia.

Polo tanto cómpre aprobar un procedemento interno que dea solución a dous problemas principais:

- Dunha banda, que facilite o procedemento de toma de decisións no seo da Comunidade de Traballo.
- Da outra, que posibilite a integración de novos actores e determine a composición das Comisións Sectoriais, para adaptalas aos novos requirimentos da política comunitaria e nomeadamente a estratexia 2020.

En consecuencia, adóptanse as seguintes decisións:



- I -

## **O GRUPO DE SEGUIMENTO**

Créase un Grupo de Seguimento da actividade da Comunidade de Traballo, coa misión de asesorar ao Comité de Coordinación.

Este grupo estará composto polos membros do Comité de Coordinación, a Agrupación Europea de Cooperación Territorial, o representante do Eixo Atlántico e os coordinadores técnicos das distintas Comisións, que serán convocados en función das materias a tratar.

Presidirá o Grupo o coordinador xeral da parte que detente a Presidencia da Comunidade de Traballo. Actuará como secretario do Grupo o da Agrupación Europea de Cooperación Territorial Galicia – Norte de Portugal.

Este Grupo reunirse con carácter necesario antes de cada unha das convocatorias do Plenario, co fin de preparar a proposta de orde do día que o Comité de Coordinación haberá propoñer á Presidencia da Comunidade de Traballo.

Tamén se reunirá, cando sexa preciso, a convocatoria do coordinador xeral da parte que ocupe a Presidencia. Esta convocatoria realizaraa por propia iniciativa, previa consulta vinculante ao coordinador xeral da outra parte ou a solicitude deste.



As funcións do Grupo de Seguimento serán:

- Asesorar ao Comité de Coordinación na preparación da orde do día das reunións do Consello.
- Debater os asunto que deban ser tratados no Consello, para asesorar na preparación das propostas de resolución dos mesmos.
- Colaborar co Comité de Coordinación no seguimento e a continuidade das actividades da Comunidade de Traballo.
- Estudar, antes das reunións do Consello, o programa de actuacións da Comunidade de Traballo.

O Grupo de Seguimento poderá crear grupos “ad hoc” nos que se debatan os asuntos que atinxen ás distintas áreas de interese, ben entendido que con posterioridade as súas conclusións deberán ser refrendadas no seo das devanditas comisións sectoriais. O Presidente do Grupo pode convocar a expertos nas áreas a tratar para que asistan a estes grupos.

– II –

## **AS COMISIÓNS SECTORIAIS**

Na actualidade existen tres Comisións Sectoriais, que se acomodan á estrutura do Programa Operativo de Cooperación Transfronteiriza España – Portugal.



E necesario adaptar as estruturas da Comunidade de Traballo á evolución que está a seguir tanto a Eurorexión como a propia Unión Europea, e nomeadamente á súa Estratexia 2020. As Comisións Sectoriais deben poder dar unha resposta áxil á situación e que teñan un papel mais activo e prospectivo, para que a Comunidade de Traballo reaccione de xeito áxil ás novas demandas.

Polo tanto, as Comisións Sectoriais quedan configuradas do seguinte xeito:

- Desenvolvemento sostible e planeamento
- Cidadanía
- Innovación e eficiencia enerxética
- Desenvolvemento económico e turismo

Para a reunión do Consello, cada Comisión Sectorial preparará un informe sobre as actuacións desenvoltas e as perspectivas de actuación para o seguinte ano. Este informe será preparado co Grupo de Seguimento, quen integrará todos os informes das distintas Comisións Sectoriais.

As Comisións Sectoriais haberán de reunirse, a proposta do Comité de Coordinación, ben en pleno, ben en se creen grupos creados ao efecto, para debater os asuntos que atinxen ao seu sector, ben entendido que nese caso os seus acordos deberán ser refrendados con posterioridade no seo da Comisión Sectorial.



– III –

### **AS COMUNIDADES TERRITORIAIS DE COOPERACIÓN**

Logo do tempo transcorrido, resulta necesario adaptar as Comunidades Territoriais de Cooperación ás disposicións do Tratado de Valencia. En consecuencia é preciso renovar os acordos asinados entre as Comunidades Territoriais, dando cabida ás novas formacións que están a xurdir nesa contorna, ao abeiro das novas figuras xurídicas existentes, como as Agrupacións Europeas de Cooperación Territorial, ao abeiro da normativa comunitaria.

Búscase así adaptar as Comunidades Territoriais de Cooperación á nova etapa da Comunidade de Traballo, para e incrementar as relacións e actuacións conxuntas entre a Comunidade de Traballo e as Administracións Locais, mellorando dese xeito a cooperación de proximidade.

– IV –

### **INTEGRACIÓN DE NOVOS MEMBROS**

Acórdase facilitar a participación na Comunidade de Traballo ás institucións que teñan entre os seus fins a Cooperación Transfronteiriza e que así o soliciten.



As candidaturas a integrarse na Comunidade de Traballo Galicia – Norte de Portugal serán ser aprobadas polo Comité de Coordinación, unha vez oído o Grupo de Seguimento. A decisión deberá ser refrendada polo Consello da Comunidade de Traballo Galicia – Norte de Portugal

Nesa liña, é especialmente interesante que a Comunidade de Traballo, a través do Grupo de Seguimento, estea especialmente atento aos novos actores que, pola vía das novas figuras do dereito comunitario, como as Agrupacións Europeas de Cooperación Territorial, están a xurdir no territorio da Eurorrexión, para entablar con elas as relacións que en cada caso sexan oportunas.

– V –

### **O CONSELLO ASESOR**

Logo de vinte anos de funcionamento, son moitas as personalidades de distinto tipo que teñen contribuído decisivamente á consolidación e avance da Eurorrexión.

A Comunidade de Traballo Galicia – Norte de Portugal quere aproveitar a experiencia que poden aportar estes persoeiros que, de xeito voluntario, queren seguir colaborando no aprofundamento na cooperación transfronteiriza.



Crease, xa que logo, un Consello Asesor, de carácter consultivo e no que se integrarán, de xeito voluntario, aquelas persoas que teñan contribuído de xeito notorio ao desenvolvemento e ao avance da Eurorrexión.

O Comité de Coordinación, logo de escoitar ao grupo de seguimento, poderá acordar a incorporación ao Consello Asesor de aquelas persoas de recoñecido prestixio que teñan colaborado de xeito notorio coa Eurorrexión Galicia – Norte de Portugal.

As reunións do Consello Asesor serán convocadas polo Comité de Coordinación, a iniciativa propia ou a proposta de un terzo dos membros do Consello Asesor, para pronunciarse sobre as cuestións relevantes para a Eurorrexión. En todo caso, os membros do Consello Asesor serán convocados para participar no plenario da Comunidade de Traballo.